

Nums locals registrat digitalmein

Cun agid da google earth san rodund 1500 numbs locals da Tujetsch vegnir tschercai

DA HANS HUONDER / ANR

■ El decours dil davos onn e miez han Bruno Berther e Tumaisch Valier arcu-nau digitalmein rodund 1500 numbs locals dalla Val Tujetsch. La registraziun ei succedida cun agid da google earth. La fin da settember vegn la plattaufoma cun quellas indicaziuns presentada e pubblicada, aschia ch'in e scadin ha access sin quella. Numbs locals ein scazis culturals e historics da biaras vischnauncas. Ferton ch'els surveyan pli baul alla populaziun per informaziun, van els oz pli e pli en emblidonza. Da numbs locals sesurveschan ozildi sper ils purs, ils bostgers e catschadurs sil pli auc amits dalla historia locala. Per impedir che biars numbs locals dalla Val Tujetsch mondien culs onns en emblidonza han Bruno Berther e Tumaisch Valier lantschau l'entschatta digl onn passau ina retscherca fundada. En num dil Forum cultural Tujetsch han els consultau skizzas veglias, gliestas da numbs e documents historics sco era interrogau vischinias e vischins da Tujetsch e la fin finala catalogisau digitalmein ils numbs locals.

Dabia avon maun

«La litteratura locala tradescha meinswart numbs locals, savens eis ei denton aschia ch'ins sa buca localisar quels», di Bruno Berther che ha entschiet a sefatschentiar dils numbs locals avon rodund 35 onns: «Sco vadler dall'Alp Tgom hiel jeu entschiet a fotografar loghens ed a documentar quels cun ils numbs locals. La documentaziun ei lu denton setschentada en in truchet ed ha ruassau leu dapi 1982.» Semeglionts documents han el e Tumaisch Valier saviu eruir plirs ils davos meins, denter auter ina veglia skizza da Gion Battesta Giger da Selva/Do-


mat. Quel haveva nudau sin ina carta geografica ils numbs locals dil contuorn da Selva e Tschamut. Numbs locals ein denton era da cattar el cudsichs davart la historia da Tujetsch ed el Dicziunari Rumantsch Grischun (DRG). Medemamein exista ina publicaziun davart ils numbs locals da pader Ambros Widmer dalla claustra da Mustér sco era indicaziuns da pader Placi a Spescha en connex cun la descripziun dalla Val Tujetsch. Cun la cultivaziun ed alpegjaziun intensiva haveva pli u meins mintga liug pli baul siu num. Aschia savev'ins nua che las plauncas, ils stavels e las vals, las palius, ils praus, ils crests e canals, ils uauls, mo era las fontaunas eran.

Registrau digitalmein

«A nus ei setschentau la damonda dalla registraziun da quels numbs locals», di Bruno Berther. La soluziun han ils dus iniziants cattau communablamein cun il biro d'inschignier Cavigelli da Glion: «Lez ha mess a disposizion a nus la plattaufoma dallas parcellas dalla mesiraziun ufficiala e cun agid da google earth havein nus saviu cumpletar quella cun ils numbs locals.» Avon rodund in onn e miez ha la lavur intensiva dalla registraziun entschiet ed entochen oz ein gia rodund 1500 numbs locals registrai sin las cartas. Quei lubescha agl utilisader da tschercar il liug dil num sco tal ni d'elegir il liug per eruir il num. Per contonscher

ina lavur aschi precisa e completa sco pusseivel han Tumaisch Valier e Bruno Berther suttamess ils numbs per controlla a plirs vischins: «En quei connex havein nus constatau ch'ei dat differenzas da numbs e da loghens. Sin fundament da lectura e fontau-nas segiras havein nus denton empruaru d'exequir la registraziun tenor meglier saver e puder.» Sin fundament da quei sistem electronic eis ei pusseivel da far da tut temps correcturas ed amplificaziuns dalla plattaufoma.

Il project davart ils numbs locals dalla Val Tujetsch vegn presentaus venderdis, ils 30 da settember 2011 alias 19.00 ella sala da scola a Sedrun.



Cun agid da google earth presenta il Forum cultural Tujetsch ils numbs locals dalla vallada. Ina interessanta lavur sco document dalla historia per las generaziuns vegnentas.

FOTO H. HUONDER